

夜

雨

秋

燈

錄

夜雨秋燈錄卷七

天長宜 鼎瘦梅甫著

大腳仙殺賊三快

半截美人朱氏甘泉人歸某甲甲粗蠶貧不能養母賴美人爲商家保母得資奉甘旨生有殊色不施脂粉不作時樣妝以裙下雙趺不作弓月樣故人皆呼爲半截美人其實卽近今所謂黃魚所謂門檻裏又所謂大腳仙也鹽商某慕其容厚值致之所乳子多肥白又善伺主人意惑之深主婦偶譖之逐美人子輒呱呱啼美人轉子又咕咕然喜也故得值恒倍於常甲善博資耗則索美人值無怨也咸豐三年粵匪踞金陵揚震恐議降議禦紛紛不能定美人私說於主人曰降禦皆非善策揚俗奢必災盍早營窟乎已而城陷美人先夕出將奉姑遠徙一黃

衣賊目突至其家殺姑及夫擁美人上馬鍵巨室中將汚之美
人含笑甘語以媚之曰郎在天朝何官賊屈拇指示之曰占天
侯曰位已列爵尙未經人道耶長夜漫漫杯酒相樂若白晝活
秘戲得毋爲將士笑乎賊大喜開筵張樂須臾月上美人艷妝
出歌吳歛侑觴韻可銷魂蕩魄忽覩甲仗手戰而股栗賊醉脫
曰卿何怖曰妾小家女也見兵革能勿驚耶賊立命撤却頃又
抱賊耳語曰麾下將士耽耽虎視霎時我兩人赴陽臺渠等穴
壁看得毋大掃興賊卽傳令各歸伍退三舍不喚汝不入也賊
醉乃代弛褻衣裸而仰臥腿聲促美人寢曰少緩乃自注水於
浴器一絲不挂徐徐濯下體漬漬有聲聽賊鼾息已十數轉慮
其詐故試以褻語不應遂柳眉倒豎粉黛生殺氣視窓前月朗
刁斗遠鳴急索剪刀就鞋底磨再四蹴登榻跨賊身上覷定咽

喉猛搥之賊瞋目視美人奮欲起壓之不得動血噴出滿細褥
霎時斃矣復拔劍刺其腹腸出乃止展衾覆之聽漏已四鼓潛
浣手整衣出鋪戶宵遁望門投宿不敢言第詭云逃難者賊中
繪圖索之不可得嘗讀元史至正年濮州薛花娘殺賊一事如
窺醜鼎如玩秘戲半截美人何其不侔而合耶因思揚州女僕
果豐冶備於商家憑官媒寫葬身紙必預書刻己身懷六甲防
後患也近日宴客多招以侑觴否則座客不歡纏頭之錦竟多
於纏足者又一女陳姓阿脆真州人浪甚寇陷時女逸出踽踽
走西山晝伏夜行將奔大儀尋伊姊妹行討生活至秦欄鎮以
爲距賊遠放膽行偶思遺遂循大溪意入蘆葦中私且憩突一
黃巾賊目負洋鎗佩刀貿貿然從溪右來兩面皆水不及避反
坐以侍之賊拉與亂女正苦無川資瞰賊腰纏纍纍欣然就之

賊脫女衣一絲不挂仰臥溪岸而已則僅將窮袴女佯笑曰急色兒可笑男女歡合全賴裸抱肌膚磨擦得趣若此則終是隔靴搔癢耳賊笑從之甫近身尙未解鈴女故作浪態乘不意遽樓之滾入溪水中女本江邊產向習流而善泅者賊入水四肢浮泛女力捺下沉三冒而三捺之已作尾生橋下死矣女抽刀斷其頭取腎上金跳脫席捲囊中黃白着衣打包從容負之去臨行復回顧水際詈曰狗賊快樂耶後入安宜嫁一少年郎頗伉儷稱小康移家秦郵近已爲子納粟稱太母矣

懷儂氏曰人間最慘莫如女子纏足聲母之於嬌女也雖愛若掌上珍獨纏縛雙趺如酷吏之施毒刑曾不能少加顧惜主之督婢鵠之飾雛慘尤甚焉每聞此聲輒痛罵東昏侯寡恥鮮廉宜乎覆國纏已纖纖阿母意猶未足及步生步蓮花矣而豺虎

猝來挪移傾仆直恨無彩翼雙飛耳愛女之家亦曾記此亂離時乎之三子者談笑不驚或手刃之或計賺之而且尺二金蓮其行便捷出入虎穴極紆極閒倘遇斯人當破產以購之一捧硯一添香一頁劍粉黛中饒有英氣

又聞一周姓婦吾鄉東鄙人自恃足大善走難將及先囑良人挈子女潛遁已則摒擋長物市就緒郊外邊馬已四出無已懷一利剪出門將覓小道尋親串家暫避其鋒忽一賊目自遠道瞰婦似有風致揚鞭追及喝之止婦亦不懼含笑相迎宛如舊識下馬推婦於地將淫之婦佯解禪帶而笑露其齒嗤形於鼻賊問云何曰我惜子愚耳子等跳梁全賴驥足設與我苟合時馬遽逸奈何賊思其言頗近理又能慰已然四顧荒郊無一樹一石可以攬轡頗籌度女云獻一策然後爲所欲爲賊求計甚

急大聲曰急煞也。蓋以韁繫於而足乎。賊撫掌稱善。乃灣腰頻首。牢縛不稍鬆。時婦之剪刀已在手。乘不意。蓄以剪刺馬股。馬負痛。遽咆哮。拖賊絕。應奔剪在服肉中。愈走愈搖。愈搖愈痛。痛則狂奔如躡電。如追風。十里外。猶不輟。而賊已膚裂額爛。骨折氣竭。不似人形矣。婦徐徐整衣。裙拾賊遺之包裹。遙望馬拖賊去。覓路始行。及尋得良人。相與剪燈話終夜。吃吃笑不休。

憺儂又曰。紹紳家閨秀。原難尺二飛鳬。使外觀不雅。然亦何必過小。彼嫵者。背曲肩駝。雖裙下解結。極纖亦非真麗妍者。體柔腰細。卽裙下玉笋稍巨。何碍輕盈。總之以五寸六寸爲準。庶合中庸。安得賢有司。出示嚴禁。凡五六寸以外。置不論。若五六寸以內。定求纖纖而翹翹者。卽照妖冶誨淫論。

東魯婚姻俗例凡綵輿到門女家必預繕一簡名曰啓書隨新
嫁娘送去其詞無非吉利語如蘇才郭福娘子彭年之類也有
南郭秀才本不羈士因貧館田舍翁某甲家甲有女字某乙子
婚有日矣甲告秀才曰某粗鄙不解文字將以啓書浼先生某
固村而親家亦非雅請先生務去陳言別翻花樣說莊家本來
面目寫農人老實因緣庶免雷同敬求椽筆秀才曰善子當以
黃雞白酒享我爛醉飽餐看我揮毫洒翰何如甲果如願以償
秀才作文曰伏以咬文嚼字秀才當行拙口笨腮農人本色冠
旣帶夫平頂禮休重乎尖酸恭維親家老哥耕耨事業樸實人
家築蝸牛之廬黃垆當斃鋪牡蠣之路綠柳成行陳穀爛芝麻
真是小圓尖而大圓滿肥葱嫩蕪菜不減南園棗而北園桑槽
頭喂板角之青力能耕地門前拴粉嘴之白喊可驚天而弟則

徒守清貧難期濁富身穿四塊北露後遮前頭頂一盞燈沒棧
少緯伸出去兩隻赤手縮回來一對空拳聞你家令郎纔讀詩
書卽識一丁之字愧我家大姐甫知針黹難堆滿面之花幸逢
月下老人得配人間佳偶伏願女知靜好男解愛憐孝順公婆
和睦妯娌養兒做極大官員改其門而換其戶生女織許多布
匹長其財而肥其家趁此良辰圓其好事行見三村五舍牽來
告朔餼羊會看黃酒白燒醉倒奔泉渴驢五百年冤業棒打不
開一肚皮牢騷寫來好笑臨啓雀躍忭頌莫名秀才書就頗自
負甲聽其雄誦亦爲之首肯詎乙與賀客傳視莫不以爲譏訕
且以渴驢句比客爲畜以冤業句視乙非人乙大怒朱陳會晤
時揮以老拳遂致鼠雀適邑宰亦援例出身者之無甚辨見兩
家爭訟甚急窮執筆人以秀才對遂飛鐵械至與以夏楚秀才

不服語侵長官乃付廣文籍禁據實申詳以爲興大獄矣而上
游囑之狂笑不已判牘尾云綴俗成文不過秀才遊戲小題大
做足徵縣主糊塗夏楚枉及無辜冬烘是其本相而兩親家與
訟只爲不通百里侯申詳何其多事但啓書別樣機趣橫生當
付彼廣文爲諸生退才之炯戒且罰汝薄俸酬文人遭拍之冤
刑兩造逐回一批絕倒宰奉批甚惶恐而秀才亦搖擺出牢籠
矣

懊儂氏曰語云對不識字人莫作才語讀書人不可不知余向
好弄筆頻遭不題之名良由鄙夫俗子知識雖鮮而忌諱頗多
也昔有村學究爲東人書聯有老熊如鶴健之句東人大罵云
僕卽陋何至比爲老熊學究百辨莫信遂致解館噫鼎鑪珠玉
原不能執擯糞人辨其眞贗耳

驢化爲履

東臺某鎮有富翁朱叟擁厚資而慳吝殊甚體患疥與人較錙銖恒狡賴故里人呼之曰癩狗皮爲子延師館于家多以冷字問師師略囁嚅卽云不通押揄之人多裹足不敢就邑佟生滑稽士也貧無已俯就其館甫莅臯比卽大書一仁字于壁下註云人能識得方許以冷字問我叟遍搜六書八法廣詢名儒碩彥不可得其音婉詢于生笑不答翁于市上購物必精擇其價之廉者買魚爲膳非腐敗不入門人間之曰吾恐傷生耳一日隣家豕瘟死人以爲有毒不敢食獨翁以半價買歸剖而醃作脯每夕登盤生誤食欲哇因拈瘟豬肉三字囑徒對徒蹙額苦無偶轉求教生笑曰齏才俯拾卽是何不逕對癩狗皮尙不工巧耶適催租隸來翁畏而勉留飯卽邀與生同案餐盤有鹹蔬

首生吟曰盤中尙有豬頭肉座上何來狗腿羞租隸聞之愧逸
去一日有陝客牽驢來鎮乞於肆云斷資斧不能歸求衆援不
應客歎曰吾假甚實力窮本擬乘驢返今欲貨之急切無售主
盡殺之貨驢肉較易也且肉值廉僅取價常之半因假屠刀揮
之驢首斷血縷縷濕街市塵再加撻切成塊繫以草縷挂壁上
人爭售之頃刻去其半翁聞之急携錢詣購其腩者歸客驟貨
肉錢得十竿太息徒步去翁歸以驢肉滲鹽儲於甕剖小小一
嚮炊於釜歡忭慶喜不可名言廚婢燃薪煮移時偶揭釜蓋睨
其生熟大驚蓋內突化爲爛草履一雙告翁大駭詫視甕中則
滿滿皆雙不借問隣家有貨肉者亦如是然隣貨肉少不似翁
之多蓋遊方術士用障眼法破慳囊者翁不知也愧悔叫罵又
不可名言生聞之大笑捧腹戲仿月令句黏於壁云是月也騙

子至慳囊破銅錢去臘肉入釜化爲履癩狗無聲翁見之益怒
生無禮年終解館囑人示意請另就生曰諾卽刻解館翁盛治
餽送生行甫執七翁盛服跪地叩有聲詢所求曰師所書仁字
老漢幾悶成癰乞明示救殘喘曰此牛字翁不識耶曰何無一
懸針生笑曰渠偏強好以冷字炫人又貪婪吝於資強在筋故
抽去脊筋耳聞者莫不大笑

慎儀氏曰海濱之魚有名草蛙底者釜中之鱖竟亦化爲雙不
借耶夫履適足之物也術人豈易翁以知足之意乎翁不知之
猶然怒詈師之戲也徒取怨尤

樹孔中小人

廣省澳門島有居人姓仇名端時隨海艦出外洋貿易各國一
日遇颶船中老大面無人色洪濤巨浪中隱隱現古島因急就

而艤其舟得無恙少頃風息老大等持篙弄楫力已憊仇登島
散步見島中枯樹甚多大可十圍樹多孔孔中有小人居之人
長僅七八寸有老幼男婦妍媸尊卑之別膚色如果子皮每人
身上繫小腰刀弓矢等物大小與人稱見仇竄之齊聲曰暗渠
三呶喇仇適思遺卽解袴蹲地上并就石鑽火吸烟忽聞人聲
嘈嘈如秋塘鳬雛結隊而至驚視之見枯樹最多處有小城郭
高可及膝皆黑石砌就城門大啓小人約千餘聯臂而出搖旗
一呼各樹孔中皆有小人出迎拱聽號令其中有年輕者面目
端正束髮紫金冠雙雉尾銀鎖甲騎半大雞雛指揮如意口喃
喃不知作何語旋聞衆噉噉曰希利執堅擁至仇大驚知爲驅
已來然藐其小不甚恐怖蹲如故年輕者又喃喃多時仇不應
卽揮衆與戰小箭小槍刀小戈矛鑽刺兩股頗痛惡之戲以手

中煙筒擊年輕者一擊遽翻落雞背上斃矣衆攫尸回城堅閉其餘皆竄入樹孔中仇亦因舟夜靜聞岸上小人大至擲砂泥而呼曰黎二師四呀喇鷄鳴始寂仇枕上自思若攫得一二頭回故里轉可炫俗攫孔方翌晨託言採薪携斧與布袋之故處甫破一樹其中小人甚夥尙有酣眠未醒者仇一一拾而裝布袋中約略一門斧屬無一逸者歸舟潛以飯哺之亦食而尤好食松子果品正擬復往而岸上小人如蟻集蜂屯如恆河沙數口喃喃若詈罵且小箭如雨船人怨恐解纜去月餘回廣以之間名宿咸以爲樵僑國人問洋人云是物能醃爲臘其味甚甘一人不敢獨行恐爲海鵠銜去耳仇喜于市上設布障置小千盒周圍鑄水晶片觀者如看洋畫得資甚富時都轉某公愛之授意鹽賈賈出千金購去雕紫檀作小屋宇前後三進兩旁

遊廊其中更設几案牀幔衣箱奩具等器即日獻都轉贊若連城小人以幼者爲尊時見年老者折腰揖孩提又以婦人爲重時見鬚眉者屈膝向巾幘一晝夜宿三次蓋以一日爲三日也男婦各就一處宿每宿必懔然不容人偷瞰瞰則羞憤拔刀自刎死又最畏雷聞雷聲須裝於棚中藏地窖內衆久之漸通人意旨每見都轉所苦艷姿頑童必叩首若見道學龍鍾老輩者匿不出愛人著鮮衣闊服見必舞刀弄棒獻諸技若見破帽殘衫者必爭出指之怒詈曰蒜平吩咐性最妬見人有技能者必效其所爲不成又詈曰苛二鳥三吩咐性又最疑防人竊竊耳語然又畏大聲疾呼高譚闊論者每聞聲必詈曰飯平飯平師二吩咐都轉愛之深遂禁人對小人語語必代小人詈以媚小人而小人益橫矣都轉諭像生店製小紗帽玉帶袍笏小堯牟

鎧甲兵器與小人爭着之搖搖作學究狀跪拜如官人狀漸引
導學串戲性又最靈不數日已能演五六折但舞離中立而歌
則不辨爲何腔也有時與以銅錢卽愛不釋手口咬腳踏而錢
不能碎則又嚶嚶啼僕人偶有相撲罵爲戲者小人見之手足
舞蹈樂不可支由是知小人喜人撲與罵小人有時戚戚思島
嶼都轉必命僕人撲罵博小人歡又爲小人製小匾額懸木盒
上曰猶傲蠅螟又曰罔談彼短自製小楹帖懸盒門曰槐郡能
游芥舟可渡壺天不遠橘隲非誣小人見之知向都轉鞠脰謝
年餘諳其馴爲之開盒面玻璃門小人間出而遊於文房左右
一日都轉他去遺紅頂花翎帽於几小人瞰之喜摘下帽頂兩
人對踢之如毬摘下孔雀毛兩人互扛之掃案上灰如帚正嘻
笑間都轉至小人爭襲頂翎逸頂墮地碎矣翎落火盆中焚矣

而都轉不怒反顧之笑明日有年家子衣冠謁都轉偶遊書室正值小人趑趑嚶嚶躍儿上年家子不知爲何物大驚失聲狂呼曰怪哉視小人已驚斃其二餘則潛盆中詈曰嬌三尼二師二呶喇都轉由是深惡年家子置不理

懷儂氏曰觚異經云西海之外有鵠國其人長七寸有禮好經綸跪拜行如飛日行千里百物不敢犯惟畏海鵠遇輒吞之丑鵠腹中不死然皆多壽有壽至千年者不聞其一驚卽死也又西北荒中有小人其君朱衣黃冠輅車乘馬而出人遇其出抓而食之其味辛能識萬物名字殺腹中三尸虫然皆小一分不似其長七寸也又輟耕錄中載海外有名靖人者亦長七寸然皆露處不聞其有城郭也熙朝新語載倭國曾遣使入貢其使烏紗絳袍後擁曲柄小傘然尙長如五歲兒不聞其如是之

小也藐矣么麼其所謂小人之尤者與

楠將軍

吾鄉石梁鎮當元季有古剎爲梁武帝所勅建殿宇甚宏院產
尤沃髡奴橐富不知焚修而好淫藏美妓于地窖中外人不諳
也時正修繕工匠滿堂有漆工某正操塹丹漆忽覩梁上有光
倏一磚墮地上有守宮二睛赤髻蒼鱗爪沃雪一瞥眼已長尺
有咫正痴睨忽聞人語曰此龍也守宮騰起衆爭逸工不及奔
伏几下適蒙師供至聖孔子木主卽戴十首悚惕不敢動聞雷
聲大震雌電飛馳雲霧中猶覩門外一青龍至首橫尺木丹書
若符角杓旂裏兩黃絹門小龍首碍因側角蜿蜒入門內守宮
突化爲小龍若迎迓戴尺木者畧一轉身瓦礫飛舞視青龍攬
殿脊寶瓶中珠大如碗兩小龍各挾楠木梁拍打若闢屋宇樓

閣一齊成齧粉少頃雨霽煙霧散工畢而復甦所戴木主猶益
立不動而廟則烏有僧則更不可問遍地積水浸瓦礫走告市
人奔視之惟正殿基陳設女子淨桶蓮舄數事而已其雨之傾
盆時也遠村見黑雲如山垂垂撲廟下旋即騰上猶約畧視龍
伸巨爪持殿梁舞旋聞颺湖邊漁人云是日龍以雙梁鬪空際
移時驀然拋湖墮心泛泛忽不見已而每逢陰雨湖人輒聞兩
木相撞聲登登止則天霽驗之不爽由明季至昭代梁在湖中
受日星精氣漸爲厲虐行人船遇一木如箭激趕至則船碎以
至放船時必預呼大楠將軍二楠將軍香帛禮祭之始獲免時
湖心更有巨龜不知何年淪入水每夜聞龜口汲水吐水聲咕
咕卽雨人以爲湖中二怪至道光某年有漁人父子拉絲網夜
向晨網重輕易不能達岸以爲得大魚甚夥久之愈重心急欲

棄網割纜則不捨欲曳則船將覆惶急間忽上流來一官舫男子十數人皆箭衣窄袖貌甚都因大聲呼救官舫靠漁舟互結纜助曳其網漁人兩舟跳躑施力誤墮一履官舫中不及檢而網果輕須臾曳起擲岸上官舫欲去解所結纜漁人將烹茗炊餅以酬不受忽忽去漁父子餐已天大明私衷慶幸以爲獲必勝常及啓視則并無寸鱗惟一極大楠木滿身綠苔如毛隱隱有鱗甲紋一頭雙孔若目且有睛知將化龍亦不知何故懼於網始識網之所以重也回憶曩危急詣岸上金龍四大王廟焚頂酬神視壁上所懸神船淤泥水盡濕草履亦在益恍然悟神之冥助也因送梁於廟庭遠邇聞之莫不駭詫一日示夢於寺僧曰吾兄弟成材於隋之開皇落水於元季行將化龍上帝怒我虐行人譴謫於此吾弟逃不敢再恣肆然吾軀尙受三百年

香火幸無褻浪僧告于衆爲之雕大王像紋甚細從此湖中無
撞木而鸛聲如故

曇花記

曇花本佛國產放大光明生自在香每開梵唄聲輒婆娑而舞
奈朝開夕落賦命不長佛祖慈悲見之淚下昔太史戴公督學
西秦時闢門唱名有七齡童予名節丫髻纏紅絲面如冠玉
提筆囊登階接卷太史貌其稗曰咄節院乃文戰之地非嬰孩
跳蕩之區汝來此何爲揖而對曰童子無知觀光有志曰汝能
作文乎若塊然沒字碑當以夏楚懲汝曰雖未敢逕奪錦標亦
未必遽櫻扑教太史頗以爲誇詢廣文對云此兒素有神童之
譽渠父名九如亦久困童子軍者太史疑九如携來將賈餘勇
爲兒捉刀乃杜其弊呼從者送交幕府諸君及再點則魚貫中

果有九如其人者年逾不惑野樸顏唐一村學究耳閱章節汝子耶曰然曰如此髯鬚強來作麼生若露廬山真面目法不汝容九如唯唯以退院門扃太史危坐堂皇過卓午返內省甫履闕卽聞童子喧笑聲與諸老輩辨難泯且脫帽露頂榻上翻筋斗爲樂太史攝入略呵叱節悚惕徐起整衣冠侍而聽教太史笑云我固知汝不能文也日移八磚矣不搆思而喧鬧此豈三家村塾耶對曰不奉題紙從何作文太史恍然亦自捧腹詢諸幕云是兒伎倆若何僉云敏甚惟狡獪不受羈勒然讀書甚熟百舉而不一遺乃授題與以小兒使坐并與果餌使餐節略一觀蹙卽奮筆直書不啻宿構洋洋灑灑出色當行繕就跪呈其卷云童子節愧少如椽之筆且爲刺促之文良由時近昏黃不過免于曳白耳太史閱之擊節者再適壁上黏蘭亭本拈此地

有崇山峻嶺茂林修竹句命對對云怕你不雕虫篆刻斷簡殘
編諸幕叫絕太史佯怒云童子亦讀西廂耶卽以爲句曰童子
讀西廂對云大人應東井太史色爲之霽指庭樹曰老樹千年
對云香疊一現太史恐其不祥然心賞靈慧適左右舉蠟節將
出因撫其背曰好爲之一領青衿便易子矣節忽顏色慘戚伏
地淚雨崩角有聲力辭盛意太史大詫問汝旣高尙何勞此行
泣曰童子有苦衷不敢言言必獲罪戾曰第言之無恐曰吾父
困此有年矣頃此之來原冀爲椿庭作倩不意隔絕且先獲雋
則父於今科固已卽下科亦何能爲哉乞錄父而黜節轉移之
德沒齒不忘太史呼九如卷至則荒率較離鳳判天淵矣因以
之示節曰汝父文似此奈何節叩不已太史矜其志憐其孝嘉
其慧遂許其請曰氷鑒之明暫爲汝屈然汝下科必捷鴻飛不

遠矣節歡躍再拜而出翌晨揭曉榜首爲章節還亦雋才也九如則勉附榜尾星輒啓行諸生走送九如亦携節拜車下太史謂九如曰汝之售汝子所貶贈也鴉巢之鳳豈有種哉又詢節曰冠軍人汝同宗乎曰同曰我行矣盡以一對送我章節章節還節應聲而對云呂蒙呂蒙正太史顧廣文諸人曰能不以此兒爲無價寶耶旋解襟下珮玉以贈節曰汝第自珍愛明年今日當以茂才還汝此玉卽他日券也節感激涕零嗚咽惆悵視星輅影遠始隨父而歸閱半載太史忽夢節持蠶花冉冉來謝口吟一絕云身本僊鉢羅託身植瑤島入世償宿逋蠶花依舊好迨重莅是郡急欲見孺子而蹤跡杳如驚詢廣文廣文命九如自陳雙淚盈睫抽咽而對曰節兒自承明訓歸後慘以痘殤彌留時堅抱所賜玉珮遂以爲殉太史驚惋無旣九如又云渠

降生時本夢一老枯禪手贈曇花而誕宜其不永也太史爽然始悟昔之聯句可爲識後之夢返其真耳乃振腕作曇花記以誌其事

懷儂氏曰負逋而來償逋而去人間佳子弟莫不云然獨章氏子可歎可憐令人有回也短命之感懟旣非凡孝尤卓絕曇花之喻雖想當然語亦作如是觀也又紫邑有古梅書院隣果老菴乃唐人附會神仙古蹟邑宰長公名在試書院日少長咸集中有八歲童子來觀場長公命對云梅花果老矣卽應聲曰紫陰長在哉長公大喜呼爲千里駒獎賜極隆旋亦夭亡儒林傷悼

博山兩賢婦

博山鑄十六其父以負販起家十六亦廢讀紹弓治年十六聘

里人李氏女耐姑爲婦未娶之先偶詣村市勾當遇風鑑工蝦
蚶鰓髮龍鍾碧眸炯炯求相者門如市爲其言多應無絲毫爽
也十六羨其神出腰際銅錢二百求摸索叟云來者父母俱存
棄儒習賈餘亦多驗惟云應得兩妻相伴偕老十六嗔嗟云某
田舍郎僅一床頭人願斯足矣何福消受英皇耶時父執陳老
亦欣然邀至家遍相眷屬至陳女讓姑問字人否曰尙未曰一
語孟浪莫見責女公子當是人家小星也陳大拂意曰陳某不
才忝爲此鄉之望何至以弱息爲人妾叟云但求相法不驗耳
言已拂袖逕出人俱以爲顛年餘十六行親迎禮耐姑艷而不
浮慧而不肆溫清無缺伉儷亦濃詎結褵甫六月竟生一子十
六怒疑必不貞于室朝夕詬詈翁姑亦時時誚讓耐姑無以自
明惟向隅痛哭十六欲殺其子以滅跡姑不忍彌月卽迫之歸

寧甫入門而離婚一紙已接踵至矣其父李翁忿而氣結入咎其母李媼媼思已女素守閨範動以禮閑然嬰兒固在抱也下嫁日至今始六閱月也嗒焉氣喪惟母女相對哭涕媼媼笑於後臧獲落落慢於前族人更說翁曰若耐姑者誠門楣之醜不殮之亦當醺之否則逐之然則祭而終其身作有夫寡耶襁裸物他日究誰氏子耶翁曰我亦簪之久矣若偏強當以斧鑕加其頸明日果有媒妁集於門或云某尹二郎賢或曰某簿四郎美耐姑知不能容然亦無所歸晨起抱兒走投雨香庵鬻簪珥憊尾別舍以居禪榻磚燈紡績自活庵主大悟優婆中善知識也頗憐之時加調護一夕兒鳴鳴不寐耐姑孤枕傷心亦自哀哭大悟自蒲團驚寤呼曰耐姑何其不耐耶晷時盆覆宛亦前因有日珠還圓成後果寡婦且耐夜哭況有夫之婦哉耐聞

之抽哀而已不敢信口頭禪十六自出妻也頗懼泰山涉訟既而寂然知無他思遂另議姻於陳女諷姑讓雖艷慧終覺遜耐絃續良辰十六思媛與兩妻之言雖微驗然出一而娶一終不足云箭貫雙雕也陳翁更以嬌娃已得所天雖屬補房然非遼室行當挾媛雙瞳子責其狂瞽云是日大悟偶自他村行見鍾家鼓吹喧闐賀客雜還知是再娶急歸告耐姑耐姑洒涕默不語問娘子于意云何曰死耳大悟狂笑云前日奇冤莫白若反生今日大屈將伸若反死何其痴乎耐知其中含妙諦卽跪求開示曰娘子當乘此機會往登其門抵死不去神佛菩薩一切有情自來玉汝請以二十字禪言相送偈云但得竈下養重燃獄底灰香閨聯二美此去草低徊耐祇領乃襁負其子洪潤登鍾氏堂姑靚面批其頰以逐之不去親詣廚中霍霍磨刀以

恐之不去呼婢爇持短棒交撻之體遍青傷仍不去惟伏地哀號自云死罪見姑怒稍解始叩首請代女供傳呼不計傭值日惟求兩餐夕惟求一席地情再逐無怨言翁與十六已有憐惜意隣里又緩頰云不端婦亦可憐生也阿姥何惜一碗閒粥飯俾渠亦可代新婦勞姑不得已領之惟命宿東廚隙地藉藁眠不容其擅入中堂不容其妄與新婦抗禮耐連連應諾由是潔庭除糝井曰雖新婦不潔亦代消除姑於初至頗吹毛求疵後見其服勞不少怠漸亦相安耐不呼姑而曰太母不呼舅而曰太翁呼新婦則曰娘子見故夫則走避恐不及戚屬鄉鄰罕識其面幸讓能憐耐且憐其兒避人則呼曰姊時週恤之不忍目之爲傭計重來瞬息年餘矣會舅姑壽辰十六教焚舞如期稱觴戚屬咸集忽雨香庵尾遣雛送儀至開篋視非祝具乃湯

飲也莫不鼓掌笑老尼荒謬幾如蟻叟妄言旋開宴鼓樂大作
觥籌互飛忽聞竈下有呱呱聲聒耳聾婢奔白云李氏又分娩
矣賓主愕眙其姑大怒趨而責之曰淫婢定不欲生耶前已玷
汝家今又玷我家耶耐含笑云阿姑無怒兒今日鳴吾冤矣速
邀良人來豈有兩子而不識其父乎十六猶未諧何事貿貿自
外至耐驚起執其手涕泣曰我自入汝家服役之苦婦人本分
何足云然未嘗出一瞻眺與人一語言汝於某日挑吾吾不理
夜間乘醉來逼吾草榻上勉就之今幾月耶抑仍六月耶二老
如不信有渠頭上柳花爲証先是清明日其俗男婦均簪柳花
少許新婦媚蘂碯以五色絲纏作綵縷有文理非代人所能蓋
由清明至今又將中秋也正錯愕間忽報李家老夫婦間信至
十六父子道左迎入門卽揖衆賓曰不肖女亦有今日不然天

網漏矣李翁猶刺刺理論李媼則髮指面色靛叫罵萬端毀器皿無算遽揪十六之母飽以老拳衣袴撕碎幾露其私無敢阻者十六崩角有聲亦爲其騰足而顛捉髮而擲夫婦揚言曰今日事非鳴官蕩其產毀其家不可衆賓稍勸慰卽反唇譏曰當日吾女被逐時諸君何不援手一啓齒賓語塞時讓姑父母亦在座知事必決裂急號於衆曰耐姑之貞其舍垢忍恥固已上格蒼穹始送石麟爲姑解穢頃欲解鈴而息爭合璧而免訟似非吾女一言不可讓姑果自屏後冉冉出拜諸長上云耐姊沉冤白於一旦天之靈家之福也請姊復正位兒副之若是貞操卽爲之執巾櫛亦所甘心長者具在求勉如兒言勿再鼓舌衆曰善陳翁亦樂爲之忽螻蚋來觀熱鬧場從翁後拍其肩曰陳君陳君僕之雙瞳能賜保全否陳大駭旣而大噉遂與衆互述

其事始知數之所在有莫知其然而然者也惟大悟能知必於是日臨辱又不知操何術耳乃張燈結綵奉兩家父母高座鍾携兒叩拜服罪然後互陰其女作螟蛉賓客極歡而散翌置綽檠於門表兩婦之賢耐姑再生女仍六月釀姑生子二卽如尋常其後四子皆貴惟先封嫡母而後封庶母誠如蟻變言耐姑年六十出資爲雨香庵建佛塔報大悟也

懷儂氏曰中牟謠云少所見多所怪見橐駝言馬臙背鍾十六以婦六月產卽云不貞可謂少見多怪矣孕月深者主壽月淺者主貴老隨園堂皇一語能爲嬰孩造福是真佛子心腸慈母蔭庇也吾願不識字人其胸無點墨而腹有疑團者當三復此編免唱東南孔雀我佛聞之必合十而作頌曰善哉善哉如是如是

珠江花舫

鄒子樂生筆記載江山船云江山近水人家各置一巨舫畫板
明窗巨麗宏敞父溺樂母操舵兄弟執纜友任烹調其女子率
幼習絲竹歌舞破瓜時故使應客臨風咳唾若卽若離或一二
姝或三四姝皆靚妝將以誘過客弋重資也富商大賈往往傾
囊登岸惡矣而不知廣東珠江花舫其惡更有勝於此者一老
幕府沈翁宜興人自幼入粵生平不脫勾欄門亦不娶由壯而
老猶童子身每見子弟喜北里遊者輒笑之以鼻醉後尤自誇
詡以爲如來世尊忍慾羅蜜自家已得三昧養尤勝焉無不及
也歲積修羊已收萬金囊橐鼎鼎而御僕又嚴酷錙銖必較一
日將回里買良田築幽宅爲歸隱計不復爲人家壓綫作嫁衣
矣素聞花舫名恐墮其術乃再四檢擇須無一女眷者始登其

舟一日檢就先運箱篋安置圖書而後辭別舊識始解纜行一舟爲己坐一舟載僕從不甚華麗亦無陳設飲食亦不甚豐潔遂帖然意肯行三四里忽覩一好女子淡妝素服蓬頭鴉髻而意態動人啓艚後小窗就水洗手玉腕釧磁板鏘然沈怒呼僕不應呼舟子問女何處來舟子大恐伏地而無人色女急走出艚斂衽拜曰公勿怒容妾緩稟陳近情則留之無理則逐之惟公所使未晚也曰試言之女流涕曰妾宜與人姓劉乳名小玉幼隨父宦於粵誤適惡少年奩資供賭博資罄而夫死大歸而父母又卒於官百計營葬孑然一女子孀且孤恐遇匪陷娼家思歸鄉里難髮販三寶欲自買一舟旣無資斧又無婢媼迢迢千里難獨行欲附他人舟又恐遭不測素聞長者圭璧其身乃奇男子必能憐苦况賜玉成且妾隣姆姆又與舟人熟故附寶

舟行倘賜援手賤妾生死叩環日於佛前飄師爲長者祝千秋
若竟不許妾當效湘纍畢命蓋舍此機會永無歸期耳言已悲
啼詞旨酸楚沈愕然久之曰附舟行何不可但不許入中艚耳
女應之卽起赴後艚嚶嚶誦佛號舟子亦拜謝問諸僕僕叱舟
子沈遂信久之每進一餐一飲贊甘美舟子曰此小玉手段也
每盥一巾一襪贊勻潔僕人曰此小玉潮福也翌晨抵小村落
思早僮呼僕猶酣寢忽舟子掀簾進麵餅味鮮美問何來曰小
玉親上岸爲公購來也一日清晨擁被坐忽聞骨冬一聲舟子
大譁曰小玉爲主人購早饌上跳板失足落水矣沈披衣急起
開窗覘之果有數餅飄水面衆果挈女子自水中出衣裙盡濕
瑟縮寒顫扶上船頭將之後艚開舵工太息曰小玉僅此一套
衣又無可更換不幾凍斃耶沈立命扶入中艚女不應衆如不

聞沈又言衆曰公會云不許入中艚小人敢忘却耶沈曰渠爲我致此忍坐視耶呼入臥小玉於己衾中鑽火代烘濕衣小玉起着衣含羞詣後艚操作如故沈由此心德小玉一夜人靜後似鼠子入箱囓衣履呼僕捕鼠不應將自起見小玉睡眼餒澀自艚後出衣綠綢短襖兼燭間鼠在那廂公指示之卽爲擺撲而後去一夜江風大作桅震震響若欲斷案上燈檠忽滅呼舉燭不應又見小玉徐徐籠燭入披淡黃襖就燈熱火纖指如笋凌波如芽略凝睇又去一夜暴雨水溜自篷隙入衾枕却當漏處移就乾處如故呼僕不應又見小玉手挈衣襦秉燭珊珊來登榻跨沈身上過代塞漏處溜應手停汗津津如珠喘吁吁若斷沈由是心更德之欲挑與語小玉遽携燭去明日沈忽病痛僕人懶惰恒早眠自傷委頓歎且泣小玉聞之卽詣艚代調藥

餌司盥濯極殷勤數日病瘳夜靜小玉猶忍凍侍牀頭不歸寢
沈憐之挽其臂曰卿衣裳太薄又爲老朽侍疾良不忍何不權
就僕脚畔眠小玉不答促歸寢亦不應沈曰吾犬馬加長卿齒
稗論年歲當可爲吾螟蛉女眠何得耶小玉黦首遂就脚後眠
沈覺奇暖勝於湯婆子又有一種異香鑽入鼻觀心大動不能
自持逡巡起與共枕摩挲撫慰口吃吃求歡小玉曰不可妾旣
婦又視翁如父翁又面許作螟蛉若此之爲玷辱奚甚沈因哀
之小玉曰旣蒙相愛何必在此曰卿如能令我銷魂當沒世不
忘且僕孤身獨行慘與卿同倘成就此好吾之所有卽卿之所
有不然卿卽歸宜與能榜腹活耶小玉不語沈遂與之定情備
極繾綣沈喜曰今而後方知席枕之樂勝於封萬里侯也小玉
曰妾之清白爲君輕薄盡矣由是相處如夫婦一切鎖鑰悉付

小玉忽聞兩僕逃已而一短童亦逃小玉頗駭詫而沈獨不甚追究計自解纜時至今已八閱月尙未到小玉獨催促而沈若不甚介意久之視銀篋盡空問小玉曰翁忘却耶僕盜資若干僅盜寶若干日食柴米翁病藥餌又若干舟子支付船值又若干觀衣篋亦空問小玉曰翁不知耶銀盡不借此付質庫將若何耶蚨去能飛回耶沈戀小玉美昏昏亦不甚盤詰一日舟子喜曰到矣沈欲登岸小玉止之曰翁將何往常言家無一椽能露宿耶故里聞翁挾重資回必蜩集求告貸謂翁之資斧已罄誰信之耶然則再求人誰應之耶岸上有妾阿姨家頗雅潔不如就彼處養病妾承翁錯愛既不能樹貞節坊亦不願別抱琵琶且作臨邛棲止家離壁立妾尙能拈針量不致有庚癸呼也沈思鄧山已殞阮囊依舊不得已從之入其家果如女書居以

淨室起居安善女皇皇時出入時來伴翁寢時就他處宿心疑不敢問亦不敢出突二三舊雨來訪皆粵之名幕府驚詢何亦過返笑曰返何處耶何時返耶蓋沈舟居一載日對玉人舟子揚帆行數十里又拆流退數十里無論浙邦且終未出粵界也頃所居卽小玉家舟子卽小玉兄弟輩蓋名妓也至是始恍然乃相與乾笑遂仍居廣爲馮婦焉又一顯宦履任登畫牘耗去五千金歸與夫人言夫人嗤之曰卿勿笑他日赴任所見若輩恐亦能令卿卿銷魂也夫人大笑曰吾身無淫具渠能爲我作面首人耶曰不然吾輩愛優伶何曾非兩雄相愛恐兩雌相愛亦同此撲朔迷離也夫人更大笑以爲妄且隱隱有醋意後果買舟遣女僕迎夫人舟子女慧麗可人能眉語能目聽舉止言動無一不令夫人生歡喜心廼拜爲螟蛉女朝賞暮賞金玉珠

翠錦繡玩好不計其數船故緩緩行日僅十餘里比到任而夫
人已妙手空空矣且船值已累積短百餘金宦聞之急遣僕持
金贖取夫人歸署冉冉出蓮輿登後堂宦遽躍出撫掌笑問曰
何如

澳僕氏曰趙簡子適楚江也且惑樵機女鴟夷子遊五湖也尙
挈採蓮人天光雲影中一葉蕩漾得此數輩供巾櫛之周旋便
覺米家書畫趙家琴鶴一切有情然瓶供之蘭嗅之可也若醉
服其水則腹痛而死鶴頂之珠玩之可也若誤服爲丹則腸斷
而亡噫黃帝造舟防溺也而仍溺之者蓋自溺也

金竹寺

余髫齡卽聞揚州地下有金竹寺不得其源前歲晤屯田司馬
楊慧生姻丈偶話及云明季某甲子有皖人蕭靈威少年任俠

追踪魯仲連郭解之爲人屢屢嗟此與終後遭仇家幾蹙赤手
道至他縣匿跡船聲者二載偶步月閨茅屋中有哭聲探詢之
則孤孀幼女紡績爲生隣有富家魏虎兒瞰女艷強委禽女羞
憤不從欲自戕者屢矣其婦母朝夕纏守然虎已詎吉行將來
攫娶故楚囚對泣耳蕭聞之曰母女泣如故勿止也歸旅店袖
刃出訪虎居確躍登其垣垣盡登屋脫履步驚瓦行無聲視燈
光多處睨虎坐繡閣中擁艷姬陪狎客昵飲甚豪聞狎客笑曰
東隣女假惺惺尙啼哭明日銷金帳中一嘗異味恐麾之不肯
去矣虎曰倘偏強當投諸冰窖寒凍煞客曰虎郎惜玉情甚旖
旎豈故作險語破鬼胆耶曰嘻蕭審之確卽躍之地揮刃奔虎
遽斬之姬驚暈若斃客張皇蕭又斬之僮僕聞聲來又斬二而
逃其一視案有酒立飲三大白指潑血書壁曰殺人者蕭靈威

也書已仍躍登屋荒竄四顧不知所之忽昏黑中有白衣人執蓮花燈前引隨之行如飛比明視所抵已五百里欲尋白衣人不可得惟燈張荒草中孤焰搖搖若將滅者趨視之非燈竟朱提一錠量之約四十兩俯拾卽以爲資斧日處旅館漸聞風聲促恐爲捕者踪跡得急易裝更姓名過江聞浙省天竺山菩薩最靈顯虔往焚香求懺悔至則士女如雲比鄰如蟻然皆粧模倣儼無一真善知識焚香畢卽小住山寺發願改悔默求庇佑學優婆諷誦至虔至誠偶遊山嶺破寂視石洞中有老瞿曇趺坐目若瞑見蕭來遽喝曰富家強娶何預汝事蕭聽如冰沃頂恐洩其事心憶欲墜踰壘以滅口僧大喝曰咄白衣持燈接引汝尙爲仇耶蕭駭且感遽伏地曰弟子知罪大菩薩法力宏深定能始終解我厄曰此處非容身地盍爲我寄書揚州金

竹寺與錢方丈彼處潛身三日難卽已因袖出一函封甚固曰
速去毋回頭蕭崩角數百持函卽行十日過江抵揚州遍詢無
金竹寺心甚憂慮不敢居城中潛寓鄉村夜夕步月東關浮橋
上忽一僧打包來僧雖携燈前引燈上大書曰金竹禪院略凝
神燈飄忽已東去急趨而尾行四五里始追及已在山谷中僧
問曰男子何所見聞而逐我蕭喘息道天然遇老瞿曇事并示
以函僧曰我當誰原是白衣谿棘尊者居士旣遠作寄書郵盍
隨我歸去來須臾達一大叢林月色昏黃中視鐘樓經閣瑰偉
嵯峨司夜行者已行梆唱佛歌聲淒心肺打包僧入白方丈蕭
拱俟叢竹旁風簷烟篠文秀瑣僧出白方丈已禪定留書案
頭止客就寮房宿明當晤叙耳引蕭之一斗室雅潔無比旋出
夜膳亦極精良明日并不聞傳喚往來繼侶古貌古心老穉妍

媼其類各別然較之天竺皈依之大衆則似覺不同住三日是夜忽聞魚梵俱聲若開大道場潛披衣跣履擬往瞻視及至正殿則其聲頓寂惟見滿堂無佛像滿地鋪氍毹燈燭輝煌男女裸體橫陳綢繆交媾妍與妍偶媼與媼偶老與老穉與穉者偶大駭暑轉瞬則又妍媼老穉互更互爲之偶或鸞顛或鳳倒或背成峯或側成嶺其態旣濃其聲更昵蕭閱之始駭繼怒不禁大呼曰如此昏昏成何世界忽聞背後一人大喝曰咄六合之中六合之外六合所成男歡女愛俗子無知大聲驚怪蕭視其人紫衣科頭面如滿月打包僧侍側呼曰此鍊方丈也蕭居士其稽首蕭心雖怒而體竟不克自主玉山遽頽和南伏地方丈挽起携入所居略略問瞿曇蹤跡謂蕭曰頃子所見乃佛家之幻景也智者見之大澈大悟愚者見之可興可起無足驚詫

蕭不敢言旋諭打包僧曰盍携去重瞻水晶城當發菩提心蕭辭出見殿上燈火全無人物亦杳惟三世佛像龕燈明滅而已忽聽雞唱傳語送客打包僧手探竹葉一叢與之曰以此聊爲居士壯行色蕭領而藏於袖送出門外則迴非舊途矚躅奔馳明始辨路逕則已在甘泉山下回頭若夢袖中竹已墮去其半視所存者金竹葉也再入城詢之瞬已三年而寺中僅三日耳遂出竹葉貨之小負販大獲又設骨董肆家漸裕一日晤一女丐携女行於途見蕭伏叩曰恩公尙在耶蕭謔視爲當日難中人急携回密室詳詢云魏殞後其子告官捕得兇手如公狀斬之首落地而尸不見妾義而盜首葬甫破土其首忽成荷花燈官聞其事亦不深詰妾恐株累挈女逃丐於此者已三年蕭更爲述遇僧事互感詫遂以其女爲室事外母如母旋投行伍得

功勳仍以所易買姓登剡章官崇明守備夫婦事佛甚虔蕭每
怒夫人低呼曰金竹寺輒歛怒爲笑見人溫婉如處女後外母
死盛禮齋奠送之殯官策馬呵導歸忽於人叢中覩魏家僕急
棄官携夫人不知所之

懊儂氏曰路見不平拔刀相救佛菩薩賞其義俠故遠導幻境
以生之且詭託祕戲以悟之蓋鏡中之鏡瞳中之瞳豈真地下
有遁逃之藪世外有曲躬之樹哉至滿堂須陀洹齊化鴛鴦偶
是耶非耶幸勿當作火宅梵煨一例看也

石郎簔笠墓

崇明瀕海處烟波浩渺仙靈往來有石大郎者幼孤年十六無
恆產爲人家牧牛青笠戴月綠簔織烟時以短笛自娛意亦閒
適顧嬾且勇與羣牧鬪無能勝者然遇介屬隨潮以至帆掃而

投之不忍戕其生所主之田翁某頗賞其仁厚日卓午與羣牧
徜徉於綠樹間或捉迷藏或賭樗蒲郎獨抽尺八坐避潮吹
無腔之韻偷闕山楊柳指村舍桃花自以爲樂少頃潮怒湧天
地皆青大蚌隨一綫來泳游不去宛爲笛韻所羈潮頓落卽膠
滯沙際屢翕闕露光芒羣牧知中有夜光珠議劈而取之郎思
害神物不利詭云海物通靈刀斧必斫盜渥以沸湯則自開衆
善其言競起拾薪汲水尋田家假竈突郎待其去遠潛起推蚌
行就海祝曰蒼茫貝闕不少汗漫之游幸勿再登陸爲若輩覲
覲蚌得水圉圉焉洋洋焉忽挾巨浪如山俯仰作稽首狀海風
忽狂颯然遂逝迨羣牧以湯至郎正假寐物已予虛叱起問何
往故佯驚作煥喪語曰神物化去矣奈何衆恍然知爲所賺唾
其面亦不較明年夏時有青色牛傷海邊稻田貌頗似郎之所

牧間之不服白眼爭遂告其所主誚讓之耶嘿不辨惟思所牧
從未輕縱逸何得蹊人田會復有來告者耶忿極暮往其處隱
身以伺翌日黎明果一牛自海岸出毛色極純與已牧卻彷彿
惟頂生一角稍異既而遊戲溝塍大肆蹂躪耶暴起將擒之以
塞人口牛驚覺反身遁入海耶忘其爲洪濤巨浪尾而逐視兩
旁之水皆壁立牛所過成一白平坦道里許抵一處峨峨府第
金碧輝煌牛躍入耶亦入聽管絃哀怨內正開筵執事者皇皇
奔走無暇他窺廡下有隙地乃掩身窮異觀視座上一客類王
者佩陸離之劍領下飄白鬚一客類大夫古衣冠沉靜緘默似
抱煩憂一客類儒士然星冠羽衣英致洒然亦極尊貴一美人
類天女明璫翠羽貌雖艷而凜凜若冰霜主位殷殷勸酬者則
一少年郎被服都麗階下歌吳歌舞楚舞輕能在掌高可遏雲

客詢何節奏對以水奴拋毬新續第二曲也白鬚人亦扣劍作歌曰鞭平王兮吾非不臣雲黯黯兮奇冤莫伸吳市簫吹欲裂潮怒不可折心死不可說古衣冠者曰相國尙有餘怒哉亦攢眉蹙額而作歌曰天之險不可升地險山川與邱陵人心之險更叵測朝爲變兮夕爲更珠宮在水兮何其品瑩坦蕩蕩兮日月自明龍伯召我兮珮菊珮與蘭襟巾汨羅之萬丈兮臣心同清儒士笑曰大夫變新聲却騷韻然亦哀而艷矣某請和以巴里歌曰當年臣本寄書郵誰信三生結並頭憐煞秀才康了輩水天飄泊幾沙鷗羣起酌以巨觥曰洞庭艷福誠可羨也然尙有袍澤之情乎言已視美人無一言咸詢貞姑可否按律呂賜新聲對云請以珊管瑤箋書二十八字命樂工歌之何如衆曰善須臾書就階下人歌之曰蓬萊清淺幾成塵門外野風愁煞

人三十六湖涼月裏珠光長照女兒身郎吟之情不自禁矢口大呼曰美哉凜凜之風何其婉而厲也咸愕胎詫俗子何得犯宮禁少年郎呼縛付鼉丞懲治武士出索反接其手將行呼曰縛太急旣而大笑曰不圖石大郎死於此處大奇少年瞠視良久曰君海壖牧牛之石大郎耶曰然曰然則我恩人也何得作階下囚叱解其縛親自降階執禮甚恭曰僕非君早爲兒童戕矣此龍宮也某王世子也前化蚌出游聽君雅韻險遭不測者卽某是也盛意隆情久未能報頃能不速頗愜素心卽引之登堂遍與諸客揖曰此伍相也此屈大夫也此洞庭柳真君也此露筋真妃也郎茫然不辨云何伍相云是子本天上水星之精好與農丈人鬪得牽牛救解旋以効墮刦歸元之期世子尙宜調護客皆告別郎亦與辭世子阻之曰君宜少安送客回重與

入座問君何能來以實告曰能來不能返矣適君所逐者分水犀也予非犀則出門一步卽死卽寤急幾墮淚曰容請命於家君或有法遂去俄頃持一大珠如龍眼者曰此辟水珠也家君感君救某故持贈有此入水可無濡首之虞幸勿示人恐有焚身之禍予行矣珍重此身報德正未艾也殷勤送之出門外果無投足地試揮珠對水奔騰浩瀚中忽露一通衢且平直猶如犀之在前瞬登彼岸羣牧咸驚然大犀終不自慎恆握珠走狂瀾旣欲炫田峻以嚇愚氓不禁駕馮夷而驅海若一日抱一古鐸出上刻篆詞曰大禹驅山之鈴又一古玉上刊奇字云秦皇塞海之寶他如鑑魑魅之銅斨蛟蠹之劍珊瑚樹真有高六七尺者人謂售之碧眼買富可跨石崇耶啞然笑曰吾不能爲龍宮之賊乘觀者不意悉舉而投之人皆惡其痴嘗有巨鼉出海

翹首目睽閃卽隨之下少刻醉飽出人詢何往曰世子懸弧之辰遣介士招飲耳衆謀攫其簋偶吹笛倦而眠六七輩羈集搜腰纏大郎驚醒懼失信於世子因噙珠入口奮與衆鬥衆雖辟易而珠亦滑入喉際吞吐兩難遂顛而死鄉人憐之殮以桐棺冥海畔是夕風雷震震翌已成一巨墳明年海漲復於墳下擁一沙岡凡斥鹵之地多坍塌大郎墳獨無恙而潮亦至此止死後且時著靈異卽墳爲祠百里外瀏河素多海患居民避波臣者紛然時夢一神人鹵簿赫赫冠冕峨峨自云我石大郎也憫此廬將沒於海急遷余棺或可免厄同日而夢者百人咸驚異詢崇明果有大郎墳請於土人不可欲盜其骨更不可禱者宿紳座下夜聞天樂大作大郎車騎而至呼其人而告之曰我有一箴一笠尙懸所主田翁家迎而瘞之亦可免沖突翌起往懸

某翁視東壁後有小舍素堆破敗物撥灰塵尋之果得風雨具
爲大郎舊製遂鼓樂迎歸瘞海口如古名臣之衣冠墓且築如
崇明之廟工甫竣水至卽遽退兩處春秋賽會士女如蟻香火
如雲均稱福蔭每至月白風清居民猶彷彿大郎笛聲與海潮
相鳴咽也

懷儂氏曰犀牛逃遁卽聳身蹈海擒之是何等氣焰海藏寶物
取而炫人旋復棄之是何等廉介辟水珠至死不肯輕擲是何
等信實豪哉石大郎何待捍潮禦患兼及瀏河始謂之神耶噫
冠裳中且不可多得况牧豎乎詩云牧人乃夢吾知其不爲魚
而爲龍

馬姓

金陵有林茂才冠至陷城中謁某館習授僞書記夜聞聽刁斗

四起悲從中來不知此身作何究竟又不知尋屬有無存歿爰
默誦金經不輟久之覺遍體清涼一夕正誦經聞窗外一叟呼
曰林生林生此時尙不隨我三更耶三更者賊語遁逃者名色
也生出戶覩之一白髮叟布衣冠古鬚眉素昧平生不敢多語
叟凝視生曰爾病痴耶言已逕前攬生袖急走飄飄若御風行
時城闐闐鳴鉦擊柝賊令森嚴而叟所至巡邏者若無聞見
至獅子山挈生猛跳城下若履平地生私揣江口若何飛渡突
一滿江紅大船停泊下關口登之叟急解纜挂帆風瑟瑟直指
江北蓋叟卽舁船人也生入船見一男一女已先在男生之同
窗友也女生之隣家娃素艷之而未能銷魂者也略寒溫生卽
瞑目坐女頻視生秋波盈盈宛似心許若碍友不敢言耳時夜
色昏黑山月墮江朋友與隣女時有調笑聲漸有嫖嫖聲聞之

心大動急歛神掩耳危坐默誦金經聞叟在後梢鼓棹高歌歌
曰天風浪浪兮江水粼粼刀山劍樹兮雪窖火坑蠅蠅蠶蠶兮
蟲蟲情情何者因何者果兮絮絮萍萍夜何其夜向晨人鬼有
關分禍福無門生聽之益悚遠村雞唱曙色搖波叟曰到矣林
生出此眞州界也爾由此至揚州東鄉得生路好自爲之袖出
一函與之曰爾行十餘里可開看生崩角在地泣求姓名叟笑
而不答起視帆影如駛頃刻若逾金焦出海門外矣急至仙女
廟果遇舊雨挈赴淮安團眷屬焉視其書曰余本馬姓生平喜
於苦海救人爾能端正不負吾意兩個小痴虫故態復萌可惡
已將他帶赴東海去也生後入袁端敏公臨淮大營以軍功保
二千石時以叟書示人一夕忽隨風飄去如葉如蝶如紙驚頃
刻不見

獨角獸

興化有丐者乞食市廛間觀者圍之如堵牆余曾亦趨視蓋其人頂生一角蓋正中根束短髮如蝟毛角首微銳而稍朽如蠹蝨人爭問訊泣然曰余非生而戴角者幼不肖動輒忤雙親攫資宿妓家貧雙親噉糲糠而巴獨携酒肴就妓家食尤喜食煎炒脆炸濃汁厚味親死以蘆包瘞東郭甫歸家正遭回祿屋宇什物一時煨燼貧不能耐輒於親族友黨中唆是非挑械鬥與辭訟已則假爲調停攫錫蚌利是年年三十有二忽病自分必死數日顚肉癢甚抓撓膚裂紫血涔涔突一角出如笋掀泥自顧鏡中已似神羊而奇痛不可忍呼號狀第聞十餘日忽夢一神人告之曰爾思病從何來角從何生昌言其故痛自己寐而自省試以已之罪惡於人前姑言之痛果已頃年已六十如故

一日不言一日便痛言已唏噓淚下如雨人憐之多施一文錢由是得無餒鄉中小兒偶摩挲其角而動搖之便哀呼誦佛號自云興化東鄉人無名氏惟號獨角獸余戲爲摹小像贊云彼何人斯乞於東郭身未披毛首先戴角春笋怒芽上指寥廓其身猶人其心則獸獸耶人耶峨峨穿透地獄人間黃泉白晝非獬廌冠亦非角端饒鼎不鑄山經不刊好角逐者焉見心寒

離垢園

離垢園者東浙賈氏園也賈名雲章字天孫少穎敏遊庠後累不第遂治園圃植花樹以自娛久之癖於潔屋宇几榻無纖塵卽滌溷亦時時湔滌以離垢名園以襄雲命館聯云米襄陽愛潔成癖倪雲林嫉俗如仇凡鼎彝書畫花鳥虫魚無不珍惜破產覓之亦所不顧至戚屬隣里以急難告者則閉門不納生子

一名渾字許橋棄儒學賈每進幾諫不聽乃泣禱於神曰父有
潔癖百折不回見嫉於世恐生禍災伏乞神靈默佑感甚賈知
之大怒始習繼撻喬梓寡恩一日晨起督僮拂几帶過碎定陶
磁尊怒鞭之僮負痛鑽几几下翻而硯山又碎賈憤燥索刃僮
遂奪刃自戕其父告於官許橋上下賁綠私獻秦鳳爵且厚殮
僮養其父始罷訟一夕與妻藍氏酌婢獻羹碗炙手墮地碎賈
怒曰此供奉製也爾斷吾命根耶呼杖婢懼而投諸井許橋厚
瘞之且召僧諷經超薦無何有同學友來訪詢及收藏賈出宋
眉子硯以炫之友呵氣試潤賈惡其穢語刺刺不休友稍諷之
怒以硯擊友幾碎其顙又以炙炭煮漢玉珮火起蔓延隣舍風
號焰烈頃刻數家許橋背父婉謝厚償始無恙妻藍婉勸曰古
人以潔爲束身之範君以潔爲纏身之魔若不改悟恐隨身皆

荆棘場也尙得爲離坊園哉賈怒批其頰妻痛哭賈恒獨眠每
欲敦倫必着河魁苦溫水事畢澡身更衣熏香作種種惡態是
夕哀啼至夜有美婦人自外來曰姊姊冤煞哉個男兒毫無一
點情儂兒之幾欲墮唾藍漫應之又曰我與若遊花園倒好要
子袖出一圈示藍曰此中大有佳處視之果有樓臺花木金碧
陸離遂對鏡勻粉黛整衣衫婦以羅帶繫梁上對妻再拜回視
案上燈光如豆戶外鼯鼠甚酣萬種淒涼逡巡自縊婢覺急告
許橋已不能救撫尸號痛死而後寢賈知之猶以衣袖擦宣爐
聊滴清淚而已計岳藍叟告宰縣役到門訥訥如虎呼號啖嚼
隣人來觀亂摘花果賈目覩蹂躪痛極失聲叟疑渠尙有遺挂
之悲又以許橋重賄始忍而罷訟然家道亦從此中落矣爛銅
碎玉皆以重價購來頃以廉資售去炊烟漸斷僅剩荒園賈鏹

而子未婚時作楚囚之泣忽有客携短僮來謁仙風道骨飄飄
在門迂入與談自云張姓無字人呼爲張老相公淵博古今塵
談霏屑賈恨相見晚許橋思留以慰父以敝裘付質庫囊酒簪
燈且留下榻自賈之好潔也君子惡之小人誑之富易爲貧朋
儕絕跡頃得張不禁狂喜久之張唾落於壁必怒於心遺扇於
庭必怒於色一日勉與坐張之僮又弄蹠架上鸚鵡怒遂不可
忍張曰莫怒莫怒吾携君遊一勝境以贖罪何如不覺隨之假
山後遇一石洞僂而入蛇行數十步洞漸寬路漸平達一園豁
然開朗蒼松夾道流水涓涓白玉爲梁幽芳作幘兩壁磨崖上
鵲蝌蚪奇字似秦漢以上書踰嶺一重又得古洞薜荔五色彩
絲下垂入其室則插架牙籤間以絲竹醺香猶篆簾波有紋儿
上橫琴古錦爲褰賈欲解視之張曰不可此吾師所彈也指誤

觸絃必有天神下降風雨疾雷君旣到此不可不作東道主向
內一呼美人四集瓊筵甫設醴酒已溫品味旣佳器具尤古張
以巨觥勸客曰較君家園亭何如吃吃而對曰遠甚須臾美人
歌舞蕩魄柔魂張亦抽古劍示買曰此鹿盧七星劍也君能舞
乎曰不能張逡巡斂袖左盤右旋寒光閃灼美人更鼓冰絲頓
挫應節忽聞剝啄聲甚厲一美人自門隙窺之曰師長回矣衆
艷驚散張變色曰君速隨我後戶出繖曲廻環絕非來路視樓
閣曰瑯環秘府最多處藏金石處曰證古齋藏經史處曰辨理
窟藏詩詞處曰游藝軒藏書畫處曰怡情館又一樓峨峨三層
上矗霄漢第一層曰與天爲徒第二層曰與古爲徒第三層曰
與今爲徒有小村落畎畝參差一曰情田二曰心田三曰福田
開富貴花種吉祥草沃功德水培乾淨土行踰數十高嶺峯巒

疊翠逕坦且平曰心頭方寸地歡喜園水晶城光明藏金碧樓臺奇景炫目突轉一逕景物全非凝神端詳已在自家園中蓋未嘗出門一步耳張曰今日之游樂乎曰空中幻景耶曰何者爲真何者爲幻以爲真卽真以爲幻卽幻真幻皆根於心而不限以地也由是賈信張如神明家中所有秘玩皆質之於張張均鄙薄一無許可賈以爲太過曰君如不信目前架上古銅象高大尺者君以爲何物曰滿身銅翠斑剝陸離形製既工雕鏤亦古的真秦銅也曰秦則真秦君知秦人造此何用乎曰不知曰女子溺器耳尙高高供養不幾汚穢煞人曰有何憑證曰象脊有銅蓋嵌下象四足皆有小洞以火炙之必有驟臭氣已而驗之果然張云阿房宮五步一樓十步一閣門首皆設此物足下卽通暗溝宮人欲溺卽揭蓋解褲騎而溺之否則重樓霄漢

嬾嬌如雲何有此許多溺器惟得此始便耳賈由是稍悟視收藏皆若糞土一日謂張曰洞中風景絕佳迥異塵世然樓閣已稍寓目而鐘鼎琳琅必多而且富未知能許俗子一飽饑胖否曰不難噲小飲當與君再往一遊甫三爵賈沉沉思臥張忽拉之急走曰前由正門進後戶出今適旁門開機不可失盍急趨可進果達一處日色慘淡道路亦岐張忽遇一故人話良久告賈曰君且略散步僕隨故人行行卽來張去賈煢煢行行逾遠徑逾窄偶一失足墮土窟中鬼物鑽集曰賈某來耶挈之遊地獄泥犁十八層宛然吳道子所畫者絲毫不爽見妻藍項拖羅帶舌吐唇外二寸許婢僕被磨折死者亦躑躅至齊聲索命賈正危急忽聞王者召鬼卒引入伏案下畧訊三兩句王拍案大罵曰狗彘奴外風雅而內刻薄假清潔而真污穢所謂狂僞鄙

俚痴蕩惑者此也卽命兩傍牛頭押赴畜生道中去鬼卒驅出至一小園內頗清雅遍地芭蕉茅屋如斗內有紅粧女子憐心嬌啼賈路凝神鬼卒自後一推驚醒則身已變作小猪與老猪衆小猪同臥糞汁中間人語呼云猪產豕雛矣其數六賈心中了了卽以頭觸壁狂呼不已聞耳畔低喚曰醒醒白日皦皦大人卽夢魔耶張目四顧身猶在座客與僮已杳惟其子與病奴守於側架上鸚鵡如故曰茶來主人醒也乃泣告子使人偵之隣家柵中果生六豕一顛痴遽斃所謂芭蕉者庭中白菜一畦也曰地獄已在眼前奈何不悟遂以家政委於子已則長齋繡佛日誦金經哀號懺悔許橋娶憚氏美而賢能內助生子二皆聰穎閱四載家漸復旋得窖金力行善事建祖祠功德二十年勿替兩孫舉於鄉泥金到門賈猶檢珠璣誦孫之同年輩爭市

花草玩好以媚之皆却而不受是時座客滿堂冠裳雲集賈忽
扶杖而出唏噓曰吾一回頭爾儕始有今日吾不忘張公德也
凝於離垢園中有張公像子孫奉祀爾等願否衆噉應之乃鳩
工營造不日告成偶偕孫輩扶出張忽臨壇與賈叙舊好請示
名氏訛旋轉而大書曰張邈邈

懷儂氏曰仙人之邈邈正淨仙人之清仙人之游戲正仙人之
慈悲不肯兒回頭猛省正不肯兒能尋快活能討便宜處

陶莊

天長龍興集之北有感蕩湖烟波浩渺水禽略啁頗稱佳景湖
中央有土邱一坏廣可十畝東爲貝岡蜿蜒起伏田水四達洧
洧由東之西入湖必經土邱過登邱一望視橫冶諸山宛在几
席而後面又有數十小培塿可爲靠廂城郭臺榭遙爲西屏雙

橋彩虹如張旗鼓是真吉壤惜向無人知僅爲耕農散牧之所
忽有客自江西來毛姓嶠名方壺其字自云堪輿家館於廬龍
陶宅賓主投洽爲人寡言笑愛趺坐間言休咎無不奇中然每
午餐後必芒鞋竹笠放浪於山顛水涯粃粃來去至夕方歸又
自弄小艇遊湖上必窮極烟水深處而後返忽微疾陶翁親爲
侍湯藥瞬西風起陶翁立製新衣贈之不受翁俟其寢熟潛易
其敝者毛無奈始衣之婢僕伺役禮或稍疎翁必加杖責毛感
極忽謂翁曰旅人飄泊承盛德思有以報未知翁意所在欲貴
乎欲富乎乞示我翁曰能富卽貴耳曰湖中有佳處可爲陽宅
子孫徙而居之可富數百甲子翌日偕翁放船去爲指示卽是
邱也翁歸卽以重資購成四園水田亦在其內呼工庀材倩毛
諏吉點向毛蹙額曰翁知鄙人毛遂之意乎曰不知曰僕自知

命官往後有三十六年磨蝎運惡曜所照數不可逃若家居尤顛沛頃爲翁卜築瀛第成則翁富富則地靈怒鄙人必喪明終日黑摸索誰爲給衣食翁長者能諭子孫不失信乎曰是何言僕卽瞑目當立遺命違者墮泥犁毛喜卽爲營造上梁日毛猶與翁閒話曰若爲竹巡若爲荷亭便不負詩情畫意也言未已忽覩日邊有黑子如彈聲錚錚自西來倏忽大如鴈隼遽撲眉宇毛大呼倒地扶起視之二目已盲由是坐臥行動常在一室飲食供養精于平時翁長子次子均於是秋文武同中式翁益信毛時于柴門倚杖看湖天水月儼然出塵忽覩前岸有火光若青燐之亂舞然火有焰而光有芒問毛曰試往掘之必有得如言携畚往果得窖朱提十二顆遂大富長次兩君欲赴京兆試毛頗阻撓不聽公車北上竟中進士歸翁猶如故而其子竟

不能不心焉疑之長君旋以太守次君亦以都司出仕五六載
翁病篤呼兩子藥官回籍宦橐甚豐陳騶綱于庭翁唏噓曰爾
輩知從何始有今日耶曰大人德蔭也曰非也此毛君之功我
死後爾輩積德累功以報毛君更事之如父較重于尋常父執
則地利可堅倘禮衰卽以不孝論兩人泣受教翁更託孤于毛
賓主嗟歎翁卒二子守制于家頗事聲色作威福毛諫之不聽
卽亦不再言而禮竟從此缺毛枯坐團瓢中間廬事酣歌恒舞
聲撻督奴僕聲頗不耐忽又聞三四小童唱曰瞎子瞎子吃
了多少死蒼蠅瞎子瞎子瀆吃了多少鑽蛆肉心更厭惡一日
有門鷄誤落藩溷滌澼次子諭卽棄去長君立命以陶器就火
燂熟爲毛午餐餐已雛婢來問曰先生食雞汁甘乎曰味猶是
也曰得味外味乎毛知有異婉詢婢婢縷述大郎之惡作劇囑

勿語收七囑去由是毛心頗寒而辭色不露惟命環第四園多種桑詢何所取曰尋常青鳥只知此處爲橫冶入湖正脈沙岸回環輔山道向不知此名龜趺穴植以樹則綠蔭參天如龜蓋之生綠毛貴不可言兩人信而從之植甫年餘地忽震動舉宅惶恐毛手撫匡床呼曰誤矣詢之曰吾妄言非公子所深信盜掘中堂地二尺可得一斷碣如言掘果得文曰形則龜體則瓢葬者漢將軍破者江西毛字隸體苔花繡澀短石如磚述於毛曰公子無恐有僕在禳之尙未晚也遂扶杖步第之左右口嚼土花辨味而定穴者四曰盜急穿深井又於第後植杖畫地如人字曰盜急潛小沼如是則老元緒當長相守富貴可萬年工甫竣毛之雙瞳突開則遂揖別曰廿餘年坐承祭養心甚不安幸天佑盲瞳復明從此天涯海角或有晤時欲挽之已飄然徒

步去毛癸癸一身資斧斷絕行至來安山中有小廟距郭近神
佛拋露衆丐居之毛謂丐曰爾等能供養我我能爲爾等造命
衆丐爭應曰諾卽潔後殿一笏地以居毛各出乞於村市歸以
潔者奉毛甚殷勤年餘丐中有黃耳小犬病痢斃毛命贖錢市
小棺并小衣冠殮犬各披麻執杖號泣如所生毛於廟後點一
穴瘞犬詎瘞後衆丐心頓明漸知愧恥忽泣曰噉齷嗟來何其
難堪乎遂改習織蒲或小負販漸得利不二年丐俱化爲小康
各於近村營家室不忘毛德爭供養之毛曰爾曹曩以廟敗瀆
神已甚盍再醺資略修葺吾能使廟興衆曰諾毛爲之開巨牖
二接南山秀開土窟一洩北陰煞置鏡筒集鏡詩而神亦靈顯
車馬紛紛來報賽賣茶賣香燭者環居成村落又來高僧主禪
緇衣白足不下百人畫棟雕梁晨鐘暮鼓成大精藍是日正集

衆善信開道場毛亦合掌念佛忽有香客云自龍興集來凝視
詫曰公其陶莊之毛先生耶曰然客遂縷述陶莊事陶自毛去
後不兩年被盜遭祝融罹冤獄家業頓傾兩君創職已物故莊
仍廢爲邱墟子孫式微不知何往毛泣曰吾以一念憤不幾負
吾死友乎衆益譎毛術之神富家大室爭來邀致而毛已杳矣
至今陶莊一坏土尙無居人四井亦湮沒耕者掘地常得古磚
上有古錢文凸出并造磚工人名細玩之果募磚噫術人之神
正術人之可畏也陶君忘父遺命憑天理亦不克昌豈待術人
之穿鑿而後敗與

十丈蓮

余亂後售書賣畫時客於古淮陰市上每吟里巷婦孺嘖嘖道
吳貞女事頃又募遊鱗水晤胡君少瑜上舍詳述貞女之生死

崕略輒口齟齬淚泔泔焉吳貞女清河人其父諱慎裕公儒士也貧爲當道傭書母夫人素敦坤範夜夢口吞蓮花而生貞女父歿女方髫齡終日寡言笑操刀尺習女紅幼許字同里徐氏子念父歿而夫家亦貧且擗家難以致女年二十有八尙未行親迎禮徐氏子旋以療歿撤堂上白頭母素譖貞女賢閼不以訃女晨起忽哭告母曰徐家郎其殞謝已乎問語何不祥曰夢有儒衣冠拜於門外者非耶母已譖黜耗不禁失聲泣曰誠如兒言奈何奈何女自起更練麻走哭於徐氏之門母不忍箝禁聽其去姑見之益淒惋惶惑不知云何女先拜其姑始哭其婿周旋中禮哀毀莫生行路者過門聞哭聲莫不步爲止而涕爲墮也姑俟其哭竟忍淚告之曰吾無福負此賢婦天也命也夫復何言然兒之哀衷已申其卽迴瀛第乎女大聲曰兒無狀

未克侍亡者供含飯罪戾滋深今既登正堂奠其主妾身分明
矣更何歸焉姑曰吾亦貧也未亡人行將爲殍再添新婦能吸
風爲活耶曰兒不敢以口腹累母十指尙可謀生活誠以亡者
遽凋落失溫清抱罪九京下兒旣延殘喘敢不代厥職補幽恨
乎姑又曰兒誠賢矣其如母夫人亦孀孤無依何曰是惟賴吾
姑之慈悲耳于是體貞女烏私使往來朝夕兼定省焉女刺繡
雕繪宛轉如生人得其佩褱等物輒珍襲之以爲寶有憐而與
以倍值者女必却之曰吾不幸爲女人身又失所天是前生因
尙敢取非分之財貽罪戾乎人益義之求手製者門外踵爲接
然由此勞悴目幾失明一夜夢天女冉冉降中庭以丹授之曰
吾天孫也憐子貞孝且有疾携奉神丹子其吞之女視丹圓如
珠燦若火再拜檢衽而後服神女去女自覺心遽安而疴若失

翌再買絲挑線功倍往時逾數年姑又病女衣不解帶者數月姑彌留時笑謂女曰吾不幸有殤子何幸而有貞婦耶吾年來得汝調奉勝於若在時也今已矣行將告爾舅爾夫於地下矣吾兒幸依阿母活毋以我爲念言已目遽瞑女毀瘠號痛淚墮成冰其母恐女殉預往防閑之女泣邀四隣坐堂上奉母坐屋隅稽首曰吾夫死吾姑又死矣族無接續之緒家無期功之親留此數椽下及什物何所用乎擬乞諸長者代爲全售爲吾姑歛葬費用衆曰善遂盡以其資營齋奠就窆多事戚女向母拜別意將雉經母急抱而止之曰兒無姑尙有母也兒再死則我之數根窮餓骨交付伊誰耶由是女始大歸永作依母計清明寒食輒以一盂麥飯哭於徐氏墓道女每號慟長河之水輒鳴咽不流其族叔某時勸女再適女大聲屏逐之不容其刺刺語

舊居老屋爲秋風所破修葺殊難時河北中大王廟比邱尼某亦以名媛披薙素精戒律永謝俗塵者女與諗熟且先有嫠婦劉嫗亦因前妻子不孝携已生一幼子一幼女居焉素多苦行遂率母往僑寄尼曰一食清齋頗爲不乏且踵余懺悔可乎諸女伴針黹之餘更習飄誦雙柴靜掩燈火寂然至咸豐十一年檢匪猖狂由東魯席捲而至時正上元節大府方銜杯看鰲山燈聽鈞天曲不爲防萬騎沓至官吏始烏獸散邑之民遭焚掠虜殺慘何可言越三日貞女輩尙閉戶不深悉會里有被脅者登垣告之尼出果旌幟遍山谷鼓角作哀音歸急扃其扉曰賊至矣奈何女從容整衣履跪求母訓母瞋視良久曰若輩犬羊肆淫毒我且不忍見況汝平行行吾甚從汝志劉聞之亦携女出已同至淺水見幼子方徘徊岸側劉呼之曰兒來兒來兒生

必虜卽免兄嫂亦不可久居盍相從地下兒果奔至尾見之撫
掌曰善哉善哉是方不愧清淨優婆塞也於是六人一齊投水
死此脅從者所親見也賊颺邑之人士聞之雖未請旌莫不曰
貞女貞女云又數年一皖南士人偶至貞女死所臨流瞻眺忽
見一美女子突立水面風鬟霧鬋儀態萬方手捧赤蓮花冉冉
行且歌歌曰採蓮復採葉骨似寒水心似鐵猶記湘纍畢命時
魚不敢吞黿不齧採蓮復採根生爲貞體死貞魂旣與旒獨又
寇亂生之殺之天地恩採蓮復採藕縷絡垂珠大如斗精衛銜
冤不敢啼猶向重泉携母手採蓮復採幹苦海苦海有彼岸生
亦死兮死亦生太息重呼諸女伴採蓮復採花綵雲一片映朝
霞金銀珠貝有宮闕帝許貞魂去作家士人方痴聽忽土人有
素識女者遽呼曰此吳貞女耶女遺花而杳亭亭植水面長可

十丈光燭雲霄杳時方烏有

澳僕氏曰蓮者根勁植而污泥不染子倒垂而苦心實多淨品也非九死不回之貞女誰克當之而無愧也乎歌雖近幻而辭則甚悲作泡影可也作誅辭亦可也當其月帔風裳亭亭出水豈自炫與亦以愧夫世之爲人臣子驚戀其位橐飽其祿大變當前而貪生怕死者

古泗州城

吾鄉泗州城淪爲洪澤湖久矣土人云爲大禹命庚辰所繫水怪巫支祈逸出爲害此無稽也州城之沉乃明末事其時畫士憚南田正厲僧伽禪寺門前一水環繞出入須臾時已四十五日雨淮流七十二道山谿之水全歸於此童謠早有石龜滴血淚要命上東山之語憚甚憂之夜靜偶聞神鬼滿堂私議曰時

已至矣乞施行神曰尙有一僧一道未歸一主一僕未出姑須
與憚披衣起敝黑無人知水厄至急呼僕起携隨身文具倉皇
拔關出走過渡見廟僧携祝打包歸曰先生何往曰吾有急須
登第一山耳所謂第一山者盱山也主僕躑躅甫踰嶺天遽明
回頭一眺則白茫茫一片水國成巨浸矣由明季至昭代沉淪
已數百年從未出現惟陰雨中時有雉堞排水上臺榭人物如
蜃氣暎成蓋幻象也咸豐六年大旱湖涸而城基出好事者攜
舟步入則官廨廟宇舊址尙覺依稀街石女牆猶存其半又有
半塔矗高處齧缺非常聞卽僧伽禪師塔南將軍乞師賀蘭時
所射者人取其磚琢硯甚古樸有致惜磚質不能細膩耳有陝
客乘舟經此天暮見有大灘卽繫而止宿實不知其爲古泗州
也夜靜月如畫客舍舟登岸獨行破寂忽見高處有城垣門半

掩悄睨之中有燈火人物往來貿易若夜市客本賈人見之心喜掩入隨步所之見各家門戶懸有燈綵闌闌生涯尤爲紛擾然已掩其旁人若不之見試攬其物人亦如不見大駭視繭布貴重者攬而懷之急向西又覩一家門微啓孤檠若滅潛入視之則一家男婦皆支頤臥喚不應視婦貌酷似其婦男子貌又酷似己以爲貌偶同不之異覩架櫝藏銀處并無封誌啓之則朱提滿焉心艷之急取二百金置懷袖間餘仍閉諸櫝并代掩雙扉出見人家燈火漸闌市漸散恐閉城不敢逗遛趨出登舟倚枕駭異旋入黑甜比醒則舟子已先起晨抵盱眙矣視所攬繭布已成泥淤雜芹藻成餅視所懷朱提則翹邊細紋的真寶物惟其色黯淡水花苔繡幾滿私以昨宵宿處詢舟子約略言之云其中絕無人烟心更驚惕不知所云秋後回陝偶與其妻

言之妻曰大奇妾於某月日夜夢至一城與君一處臥甫交睫
君忽起開櫥懷銀出妾驚異尾之行君忽不見妾心急墮泥窖
中驚醒汗泠泠不已蓋其妻入夢之夜卽此客入城之時默憶
舊遊絲毫不爽又盱眙向無大聖廟大聖者卽僧伽也粵匪竄
後當道者諭捐修考院工竣尙餘三千金公議建大聖廟上梁
日適朱學使考舉親詣拈香鼓吹喧闐冠蓋雲集忽一漁人捧
一古銅鼎送廟來供養云昨宵見湖心有光一網舉出者洗滌
審視口內有篆文蓋唐時僧伽廟中物也學使大喜親爲作文
紀其事

懷儀氏曰俗云錢財通性命此公隔世猶重到故居親携阿堵
而出觀此益信其言之不誣然而蜃餘沙磧市井何來眼底烟
雲門庭依舊又何故與佛云如夢幻泡形如露亦如電明白了

當而言之惜世人不悟耳